

Ո Ր Ո Շ ՈՒ Մ

Ճանապարհային ոստիկանության վարչական իրավախախտման գործով 27.09.2021թ. թիվ ԱՖ793041 որոշումը բեկանելու և վարչական իրավախախտման վերաբերյալ գործի վարույթը կարճելու մասին

<<01>> 06 2023թ. 7-13 5122

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս, վերանայելով Սարգիս Ալեքսանյանի թիվ ՄԴ/38508-23 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Արարատի մարզի Այնթապ գյուղի 1 շարքի 40 տան բնակիչ Սարգիս Ալեքսանյանը դիմումով խնդրել է վերանայել վարչական իրավախախտման գործով 27.09.2021թ. թիվ ԱՖ793041 որոշումը՝ նշելով, որ իր գործողություններում բացակայել է իրավախախտումը:

Դիմումի քննարկման արդյունքում պարզվել է, որ դիմումատուի խնդրանքը ենթակա է բավարարման հետևյալ պատճառաբանությամբ.

<<Վարչարարության հիմունքների և վարչական վարույթի մասին>> օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները: Ըստ նույն օրենքի 65-րդ հոդվածի 1-ին մասի՝ սույն օրենքով սահմանված կարգով չբողոքարկված ոչ իրավաչափ վարչական ակտը կարող է անվավեր ճանաչվել 6 ամսվա ընթացքում այն օրվանից, երբ իրավասու վարչական մարմինն իմացել է այն փաստերի մասին, որոնք վարչական ակտն անվավեր ճանաչելու հիմք կարող էին դառնալ:

<<Ավտոտրանսպորտային միջոցների օգտագործումից բխող պատասխանատվության պարտադիր ապահովագրության մասին>> ՀՀ օրենքի 5-րդ հոդվածի 4-րդ մասի համաձայն՝ **յուրաքանչյուր անձ պետք է մշտապես ունենա սեփականության իրավունքով իրեն պատկանող (ֆինանսական վարձակալության (լիզինգի) պայմանագրով իրեն տրամադրված) և Հայաստանի Հանրապետությունում հաշվառված յուրաքանչյուր ավտոտրանսպորտային միջոցի (բացառությամբ սույն օրենքի 25-րդ հոդվածի 2-րդ մասի 1-ին, 2-րդ և 3-րդ կետերով սահմանված ավտոտրանսպորտային միջոցների) համար կնքված և գործող ԱՊՊԱ պայմանագիր:** Բացառությամբ սույն օրենքի 25-րդ հոդվածի 2-րդ մասի 1-ին կետով սահմանված դեպքի՝ **արգելվում է ընդհանուր օգտագործման ավտոմոբիլային ճանապարհներով ավտոտրանսպորտային միջոցի վարումը, եթե դրա համար առկա չէ այն վարելու պահին գործող ԱՊՊԱ պայմանագիր:**

Վարչական իրավախախտումների վերաբերյալ ՀՀ օրենսգրքի 129.2-րդ հոդվածի 2-րդ մասի համաձայն՝ առանց տվյալ տրանսպորտային միջոցի համար կնքված ավտոտրանսպորտային միջոցի օգտագործումից բխող պատասխանատվության պարտադիր ապահովագրության գործող պայմանագիր ունենալու՝ Հայաստանի Հանրապետության տարածքում ընդհանուր օգտագործման ավտոմոբիլային ճանապարհներով տրանսպորտային միջոցը վարելը՝ առաջացնում է տուգանքի նշանակում՝ սահմանված նվազագույն աշխատավարձի հարյուրապատիկի չափով:

Ըստ նույն օրենսգրքի 251-րդ հոդվածի 1-ին մասի՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնապար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

Ճանապարհային ոստիկանության ծառայողի կողմից տրված պարզաբանման համաձայն, Հայաստանի ավտոապահովագրողների բյուրոյի գործադիր տնօրենի 16.09.2021թ. թիվ Բ/21-04185 գրությամբ հայտնվել է, որ <<Mercedes-Benz>> մակնիշի 55 VP 111 հ/հ-ի ավտոմոբիլի վարորդ Սարգիս Ալեքսանյանը 26.08.2021թ. տեղի ունեցած ճանապարհատրանսպորտային պատահարի պահին չի ունեցել գործող ԱՊՊԱ պայմանագիր, ինչը հիմնավորվել է ՃՈ էլեկտրոնային ռեգիստրով տվյալների ստուգմամբ, ինչի հիմքով էլ իր կողմից 27.09.2021թ. վարորդի ներկայությամբ և մասնակցությամբ կազմել է վարչական իրավախախտման վերաբերյալ արձանագրություն և կայացվել է վարչական իրավախախտման գործով թիվ ԱՖ793041 որոշումը:

Ուսումնասիրությամբ պարզվել է, որ <<Mercedes-Benz>> մակնիշի 55 VP 111 հաշվառման համարանիշի ավտոմոբիլի վարորդ Սարգիս Ալեքսանյանը 26.08.2021թ. ժամը 11²⁰-ին Արարատի մարզի Մասիս քաղաքի Հերացի փողոցում տեղի ունեցած ճանապարհատրանսպորտային պատահարի պահին չի ունեցել գործող ԱՊՊԱ պայմանագիր, ինչի մասին Հայաստանի ավտոապահովագրողների բյուրոյի գործադիր տնօրենի 16.09.2021թ. թիվ Բ/21-04185 գրությամբ հայտնվել է Ճանապարհային ոստիկանություն, ինչի հիմքով Ճանապարհային ոստիկանության ՃՊԾ 2-րդ սպայական գումարտակի 1-ին սպայական վաշտի 2-րդ սպայական դասակի ավագ տեսուչ, ոստիկանության մայոր Կ.Մարգարյանի կողմից 27.09.2021թ. ժամը 11¹⁰-ին վարորդի ներկայությամբ և մասնակցությամբ կազմել է վարչական իրավախախտման վերաբերյալ արձանագրություն և վարչական իրավախախտումների վերաբերյալ ՀՀ օրենսգրքի 129.2-րդ հոդվածի 2-րդ մասով կայացրել է վարչական իրավախախտման վերաբերյալ գործով թիվ ԱՖ793041 որոշումը:

ՀՀ ՔԿ ԵՔԲՎ Արաբկիր վարչական շրջանի քննչական բաժնի ՀԿԳ քննիչ՝ Գ.Կարապետյանի՝ քաղաքացի Սարգիս Ալեքսանյանին տուժող ճանաչելու մասին 30.03.2023թ. որոշմամբ պարզվել է, որ վերջինս 2021թ. մարտ ամսին <<Ռեսո>> ԱՓԲ ընկերությունում կնքել է իր անվամբ հաշվառված տրանսպորտային միջոցը 6 ամիս ժամկետով ապահովագրելու թիվ <<SM425597>> պայմանագիր, սակայն նրան տրամադրվել է կեղծ փաստաթուղթ, որը ՀՀ-ում գործող ապահովագրական ընկերությունների ավտոապահովագրական մեկ միասնական կենտրոնացված առցանց <<ASWA>> համակարգ չի ներբեռնվել: Նշված փաստի առթիվ Երևան քաղաքի Արաբկիր վարչական շրջանի քննչական բաժնում հարուցվել է թիվ 44185621 քրեական գործը, որը հետազայում միացվել է այլ քրեական վարույթին և ստացել թիվ 14176821 համարը:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին մասի 1-ին կետի համաձայն՝ վարչական իրավախախտման վերաբերյալ գործի վարույթը

չի կարող սկսվել, իսկ սկսվածը ենթակա է կարճման վարչական իրավախախտման դեպքի կամ կազմի բացակայության դեպքում:

Այսպիսով, վարչական վարույթի ընթացքում հիմնավորվել է, որ դիմումատուի արարքում բացակայել է Վարչական իրավախախտումների վերաբերյալ ՀՀ օրենսգրքի 129.2-րդ հոդվածի 2-րդ մասով նախատեսված վարչական իրավախախտման դեպքը, քանի որ վերջինս 26.08.2021թ. 11²⁰-ի դրությամբ Արարատի մարզի Մասիս քաղաքի Հերացի փողոցում տեղի ունեցած ճանապարհատրանսպորտային պատահարի պահին ունեցել է գործող ԱՊՊԱ պայմանագիր, սակայն դրա մասին 27.09.2021թ. չէր կարող տեղյակ լինել ՃՈ տեսուչն այն պատճառով, որ <<SM425597>> պայմանագիրը սահմանված կարգով չէր ներբեռնվել ՀՀ-ում գործող ապահովագրական ընկերությունների ավտոապահովագրական մեկ միասնական կենտրոնացված առցանց <<ASWA>> համակարգ, ինչն էլ պատճառ է հանդիսացել թիվ ԱՖ793041 որոշման կայացմանը:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին մասի 1-ին կետով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման գործով 27.09.2021թ. թիվ ԱՖ793041 որոշումը բեկանել և վարչական իրավախախտման վերաբերյալ գործի վարույթը կարճել:

2. Վերը նշված որոշմամբ նշանակված վարչական տուգանքի գումարի բռնագանձման պահանջով ՀՀ ԱՆ հարկադիր կատարումն ապահովող ծառայություն ուղարկված կատարողական վարույթից հրաժարվել:

3. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ Վարչական դատարան՝ օրենքով սահմանված կարգով և ժամկետներում:

4. Սույն որոշման օրինակն ուղարկել Սարգիս Ալեքսանյանին և ՃՈ վարչական ակտերի կատարումն ապահովող բաժանմունք, ինչպես նաև ՃՈ ՃՊԾ 2-րդ սպայական գումարտակ:



Ն.Սարգսյան